



Hardangerrådet iks



Hardanger

SELSKAPSAVTALE FOR HARDANGERRÅDET IKS

Godkjent pr 27.10.2016
Erstattar selskapsavtale datert 13. mars 2014

KAPITTEL 1

FØREMÅL OG LOKALISERING

§ 1 Selskapet sitt namn, føremål og føresetnader

Selskapet sitt namn er Hardangerrådet IKS.

Hardangerrådet IKS er eit interkommunalt selskap, oppretta med heimel i lov om interkommunale selskap av 29.01.1999 nr 6, med kommunane Eidfjord, Granvin, Jondal, Kvam, Odda, Ullensvang og Ulvik som deltakarar.

Hovudoppgåva er å styrkja regionen gjennom større grad av forpliktande samarbeid.

Samarbeidet skal leggja til grunn deltaking frå likeverdige partar og skal vera eit supplement og ei støtte til kommunane si eiga verksemd.

§ 2 Målsetjingar

Hovudmålet med det interkommunale samarbeidet er:

1. Å klarleggja og nytta ut naturlege og menneskelege ressursar og føremoner i regionen for å vidareutvikla området næringsmessig, sosialt og kulturelt.
2. Å styrkja identiteten i regionen ved å utvikla samarbeidsformer mellom kommunane, næring, skule og kultur.
3. Å gje felles fråsegner på vegne av kommunane overfor fylkesstyre- og sentralstyremakter, i saker der dette er naturleg.
4. Ei praktisk oppfølging av fylkes- og fylkesdelplanar.
5. Pådrivar for å fremja viktige regionale saker overfor styresmakter på fylkes- og statleg nivå.
6. Arbeida for at regionen vert tilført statlege og fylkeskommunale ressursar.
7. Arbeida aktivt for å lokalisera ny aktivitet inn i regionen.
8. Samordna etableringshjelp og rådgjevingsteneste for næringslivet i regionen.

§ 3 Lokalisering

Selskapet har hovudkontoret sitt i Ullensvang herad.

KAPITTEL 2 ORGANISERING OG STYRING

§ 4 Eigar- og ansvarsdel.

Selskapet har ved stiftinga innskotskapital på 100.000 kroner. Den er innskoten ved overføring av Hardangerrådet til Hardangerrådet IKS.

Kommunane sin eigar- og ansvarsdel i selskapet er fastlagd som ein prosentdel i høve kostnadsnøkkel pr 01.01.03 med følgjande fordeling:

| | | |
|------------|----------------|-------------|
| Eidfjord | 10.0 % | 944 22 7121 |
| Granvin | 8.0 % | 844 16 2502 |
| Jondal | 8.0 % | 944 43 9927 |
| Kvam | 26.0 % | 944 23 3199 |
| Odda | 26.0 % | 964 96 7814 |
| Ullensvang | 14.0 % | 964 96 7903 |
| Ulvik | 8.0 % | 971 15 9928 |
| <u>SUM</u> | <u>100.0 %</u> | |

Eigardelen og deltakaransvaret kan justerast kvart 4. år i samsvar med endringane i inntekts- og folketalsutviklinga i kommunane, første gong pr 01.01.12. Slik justering krev endring i selskapsavtalen.

Kommunane heftar uavgrensa for sin prosentdel av selskapet sine plikter.

§ 5 Organisasjon

Hardangerrrådet IKS sine organ er representantskapet, styret, dagleg leiar og klagenemnd. Regionrådet i Hardanger. Rådmannsforum og Hardingtinget er politiske og administrative einingar som Hardangerrrådet IKS har utøvande sekretærfunksjon for.

§ 6 Representantskap.

Representantskapet er selskapet sitt øvste organ. Representantskapet er til ei kvar tid medlemmene i regionrådet i Hardanger. Representantskapet skal sjå til at selskapet vert drive etter føremålet i samsvar med lover og denne selskapsavtalen.

Dagleg leiar og styreleiar i Hardangerrrådet IKS tek del i møta i representantskapet med tale- og framleggsrett. Styreleiar har møteplikt jfr. IKS-lov §9 6. ledd.

Representantskapet skal halda minst 1 møte i året. Dette møtet er årsmøte for Hardangerrrådet IKS. Andre møter følgjer IKS-lov §8, med unnatak av at innkalling til møte følgjer møteplan for regionrådet i Hardanger. Sakliste framgår av sakliste til møte i regionrådet, spesifisert kva saker som gjeld representantskapet.

Saker etter Lov om IKS skal meldast med 4 veker frist.

Årsmøte:

Årsmøte i Hardangerrådet skal haldast innan utgangen av april og er vedtaksført når minst 6 av kommunane er representerte med ordførar eller varaordførar.

Årsmøtet skal handsama saker i tråd med lov og denne selskapsavtalen:

1. godkjenna årsmelding
2. godkjenna revidert rekneskap for siste år
3. godkjenna budsjettet for komande år
4. godkjenna arbeidsplan
5. godkjenna den 4-årig økonomiplanen
6. velja styreleiar og nestleiar i styret
7. velja rekneskapsførar og revisor
8. handsama andre saker som styret har lagt fram
9. avgjera fullmakter til styret
10. fastsetja godtgjersle til rådsordførar og til styret

Sakshandsaming og avstemmingar følgjer av IKS-lov §9.

§ 7 Regionråd

Regionrådet er samansett av ordførarane i eigarkommunane med varaordførarane som personlege vararepresentantar. Det er høve til å møta i regionrådet med fullmakt frå kommunen/heradet.

Regionrådet vel sjølv rådsordførar og rådsvaraordførar for to år om gongen.

Det skal haldast minst 4 møte i regionrådet kvart år. Det eine møtet skal haldast innan utgangen av april og skal vere årsmøte.

Regionrådet er vedtaksført når minst 4 av medlemane er til stades. Ved røystelikskep er leiaren si røyst avgjerande.

Rådmannsforum vel ein representant med personleg vararepresentant som tek del i møta i regionrådet med tale- og framleggsrett.

Rådsordføraren kan kalla inn andre til møta når han/ho finn det føremålstenleg for sakshandsaminga. Desse kan gje opplysningar og utgreiingar, men har elles ikkje høve til å ta del i drøftingane.

Rådet skal ta initiativ til å fremja intensjonane i §§ 1-2 og til å drøfta saker av sams interesse.

Regionrådet er samordningsinstans for dei utvala og aktivitetane som Hardangerrådet femner om. Rådet kan på einskildområde setja ned eigne rådgjevande fagutval.

Regionrådet har møte etter oppsett ein årleg møteplan eller når rådsordførar eller 3 av medlemmane krev det. Rådsordførar kallar inn regionrådet etter den fastlagde møteplanen som er å sjå å som innkalling til møte innafor 4 vekersfristen i lov om IKS. Møteplanen kan fråvikast når det er semje i regionrådet om det.

Sakliste til kvart møte vert sett opp av rådsordførar. Regionrådet sjølv avgjer å ta opp saker som ikkje kan venta til neste møte.

§ 8 Styre.

Styret i Hardangerrådet IKS skal vera samansett av 3 personar med 2 varamedlemmer. Styret vert valde av representantskapet og for 2 år om gongen. Varamedlemmer vert valde for eitt år om gongen. Styret er vedtaksført når 2 medlemmer er til stades. Styreleiar kallar inn til møta og set dagsorden.

Styret skal sjå til at selskapet vert drive etter lover og denne selskapsavtalen. Styret skal sørge for ein forsvarleg formuesforvaltning og føra tilsyn med dagleg leiar.

Rådsordførar har møte- og talerett i styremøter
Dagleg leiar er sekretær for styret.

§ 9 Hardingting

Hardingtinget er eit samarbeidsorgan i regionrådet i Hardanger og er samansett av formannskapa i eigarkommunane. Hardingtinget skal haldast minst ein gong i året. Rådsordførar er leiar i Hardingtinget med rådsvaraordførar som nestleiar.

§ 10 Rådmannsforum er rådgjevande utval i Regionrådet i Hardanger.

Rådmannsforum er samansett av rådmennene i dei 7 medlemskommunane.

Rådmannsforum skal arbeida for å fremja samarbeidet mellom administrasjonane i medlemskommunane.

§ 11 Dagleg leiar

Selskapet skal ha ein dagleg leiar som har ansvaret for dagleg leiing i tråd med § 14 i Lov om IKS.

Representantskapet tilset dagleg leiar.

Styreleiar utøver arbeidsgjevarfunksjonen overfor dagleg leiar.

Dagleg leiar sine oppgåver:

- Ansvarleg for dagleg drift, personale og budsjett/rekneskap for heile organisasjonen.
- Hovudansvaret for informasjonsstrategien i organisasjonen.
- Sekretær for representantskapet, styret og regionrådet i Hardanger og andre utval tilhøyrande regionrådet.
- Samordna arbeidet og førebu saker til regionrådet og styret.
- Setja i verk vedtak fatta av regionrådet og styret.
- Ansvarleg for oppfølging av utviklingsplan, tiltaksarbeid og prosjektarbeid.

§ 12 Arbeidsgjevarfunksjonen

Styret har arbeidsgjevaransvaret for alt personale tilsett i rådet. Dagleg leiar utøver den daglege arbeidsgjevarfunksjonen på vegne av rådet.

§ 13 Budsjett/driftsutgifter

Representantskapet vedtek innstilling om neste års budsjett som vert sendt til kommunane innan utgangen av august månad. Representantskapet er budsjettansvarleg.

Representantskapet har fullmakt til å føreta budsjettreguleringar innanfor vedteke budsjett og til å styrke budsjettet ved bruk av inntekter ut over det budsjetterte. Representantskapet kan gje budsjettfullmakter til styret. (Jfr. IKS-lov §18)

Hardangerrådet IKS sitt budsjett skal dekkja:

- Dagleg drift

- Finansiering av prosjekt/tiltak i regionen. Rådet kan ikkje setja i gang tiltak som fører med seg større økonomiske plikter enn det inntektene gjev grunnlag for.
- For store prosjekt skal det utarbeidast eigne budsjett, som skal godkjennast av rådet og kommunane/herada dersom det ikkje er dekning på rådet sitt budsjett.

Reiseutgifter og anna godtgjersle for kommunale representantar i regionrådet sine organ og i prosjektarbeid vert dekkja av den einskilde kommune, dersom anna ikkje er avtala.

Reiseutgifter og godtgjersle til styret og andre vert dekkja av Hardangerrådet IKS, etter staten sine satsar.

§ 14 Selskapet sin representasjon.

Styret representerer selskapet utad og teiknar firmaet.

Styret kan gje rådsordførar og/eller dagleg leiar rett til å teikna selskapets firma.

Dagleg leiar representerer selskapet utad i saker som fell under myndet etter Lov om IKS § 14.

KAPITTEL 3

SAKSHANDSAMINGSREGLAR OG KOMMUNANE SINE PLIKTER

§ 15 Selskapet si klagenemnd

Klage i enkeltvedtak i Hardangerrådet IKS vert avgjorde av ei klagenemnd samansett av leiar/medlem i klagenemnd/klageorgan i dei 7 Hardangerkommunane. Funksjonane som leiar og nestleiar i klagenemnda føl perioden og kommunen/heradet som til ei kvar tid har rådsordførar og rådsvaraordførar.

§ 16 Sakshandsaming

Hardangerrådet IKS føl sakshandsamingsreglane i samsvar med føresegnene i kommunelova kapittel 6 - sakshandsaming i folkevalde organ.

§ 17 Økonomi/finansiering

Selskapet fører rekneskap etter rekneskapslova.

Representantskapet vel revisor. (Jfr. IKS-lov §28)

Selskapet sitt årsbudsjett vert sett opp slik at det gir eit realistisk bilete av drifta av verksemda. Deltakarkommunane forpliktar seg til å gje tilskot til selskapet etter eigarandelane i denne selskapsavtalen. Årsbudsjettet er endeleg når kommunane har gjort vedtak om tilskot etter kommunelova § 45 nr 4.

Tilskot frå kommunane vert å betala i to terminar à 50%, 15. januar og 15. juni

Selskapet kan ikkje ta opp lån frå andre enn eigarkommunane.

Selskapet kan ikkje stilla garanti eller pantsetja eigedeler.

KAPITTEL 4

GYLDIG SELSKAPSAVTALE

§ 18

Hardangerrådet IKS sin selskapsavtale er gyldig når han er godkjend av kommune-/heradstyra i dei 7 deltakarkommunane. Endring av avtalen som gjeld forhold som omtalt i Lov om IKS § 4, tredje ledd, skal skje på same måte. Andre endringar vert gjort av Representantskapet i tråd med Lov om IKS § 4 andre ledd, andre punktum.

KAPITTEL 5

UTMELDING/OPPLØYSING

§ 19 utmelding

Den einskilde deltakarkommune kan med eit års skriftleg varsel seia opp sitt deltakartilhøve i Hardangerrådet i tråd med Lov IKS § 30.

Oppseiingsfristen på eit år gjeld frå 31.12. det året oppseiinga finn stad. Kommunar som melder seg ut, har plikt til å betala deltakartilskot inntil utmeldinga er effektiv.

§ 20 oppløysing

Hardangerrådet IKS kan oppløysast når deltakarkommunane er samde om det, jf Lov om IKS §32 og det er gjort vedtak i alle deltakarkommunane. Oppløysing skal handsmast i representantskapet. Møte i representantskapet må kallast saman med ein frist på 12 månader og 2/3 av medlemmane må vera til stades. Styret i selskapet er avviklingsstyre i oppløysingsåret

Oppløysing av Hardangerrådet IKS må godkjennast av departementet.

| | Vedteke: | |
|-----------------------|------------|-------------------|
| Eidfjord kommunestyre | xx.yy.2016 | Ordfører |
| Granvin heradstyre | xx.yy.2016 | Ordfører |
| Jondal kommunestyre | xx.yy.2016 | Ordfører |
| Kvam heradstyre | xx.yy.2016 | Ordfører |
| Odda kommunestyre | xx.yy.2016 | Ordfører |
| Ullensvang heradstyre | xx.yy.2016 | Ordfører |
| Ulvik heradstyre | xx.yy.2016 | Ordfører |